

ԱՆՁԻ, ԱԶԳԻ ԵՎ ՊԵՏՈՒԹՅԱՆ ԻՆՔՆԻՇԽԱՆՈՒԹՅԱՆ ՀԻՄՆԱՀԱՐՑԸ
ՄԻՋՆԱԴԱՐՅԱՆ ՀԱՅԱՍՏԱՆԻ ՄԱՏԵՆԱԳՐԱԿԱՆ ԵՎ
ԻՐԱՎԱԿԱՆ ՀՈՒՇԱՐՁԱՆՆԵՐՈՒՄ

Գ. 2. ՍԱՅԱՐՑԱՆ

Ինքնիշխանությունը սոցիալական իրականության որևէ երևույթի (գոյի) ինքնությունն է, անկախությունը և գերակայությունը: Սոցիալական իրականության մեջ ինքնիշխանության սուբյեկտներն են՝ անձը, ազգը և պետությունը:

Սակայն, այնուհանդերձ, դրանցից յուրաքանչյուրն ունի իրեն հատուկ, բնորոշ առանձնահատկությունները:

Անձի ինքնիշխանությունը անհատի կամքի ազատության դրսևորումն է, նրա ինքնուրույնությունը և անկախությունը իրավունքի մյուս սուբյեկտներից (պետություն, քաղաքական կուսակցություններ, եկեղեցական և հասարակական կազմակերպություններ, իրավաբանական անձեր, քաղաքացիներ)՝ հասարակության սոցիալական նորմերի սահմաններում (իրավական, բարոյական, սովորութային): Այսինքն, անձի ինքնիշխանությունը անսահմանափակ և բացարձակ չէ և չի էլ կարող լինել: Անձը այնքանով է ինքնիշխան, որքանով որ նա չի խախտում մյուսների ինքնիշխանությունը և սոցիալական նորմերը: Դեռևս հին հոմեոսացի իրավաբան Ուլաիանոսն է նշել, որ «Իրավունքի պահանջի էությունը հետևյալն է. «Ապրել ազնիվ, ոչ մեկին վնաս չհասցնել, յուրաքանչյուրին տալ իր հասանելիքը»¹:

Ազգային ինքնիշխանությունը ազգի օրգանական քաղաքական հատկությունն է, նրա անբաժան, անօտարելի և բնական հատկանիշը: Ազգային ինքնիշխանությունը պայմանավորվում է ազգի գոյության փաստով, այսինքն, ծագել է ազգի ձևավորման հետ միաժամանակ և կվերանա ազգի վերացման հետ: Ազգային ինքնիշխանությունն իրականանում է ազգերի ինքնորոշման իրավունքի իրականացման դեպքում: Ազգերի ինքնորոշման իրավունքը քաղաքակրթության մեծագույն նվաճումներից է, որի շնորհիվ ինքնորոշվող ժողովուրդը որոշում է իր ճակատագիրը: Ըստ այդ իրավունքի, «Յուրաքանչյուր ժողովուրդ (ազգ) իրավունք ունի ազատորեն տնօրինելու իր ճակատագիրը, ինքնուրույնաբար, առանց արտաքին միջամտության, լուծել իր ներքին զարգացման և կառուցվածքի բոլոր հարցերը, իր հայեցողությամբ ընտրել ուրիշ ժողովուրդների և պետությունների հետ հարաբերությունների ցանկացած ձևը»²: Ժամանակակից միջազգային իրավունքը երաշխավորում է բոլոր ժողովուրդների և ազգությունների (մեծ և փոքր, զարգացած և զարգացող, անկախ ռասայական պատկանելությունից, լեզվի և կրոնի տարբերությունից) իրավահավասարությունը և ինքնորոշումը, տնտեսական և սոցիալական ազատ զարգացումը՝ առանց որևէ արտաքին միջամտության³:

Պետական ինքնիշխանությունը պետության առանձնահատուկ իրավաքաղաքական հատկանիշն է, որն արտահայտվում է իր տարածքի նկատմամբ գերակայությամբ ու ինքնուրույնությամբ, արտաքին հարաբերություն-

¹ Дигесты Юстиниана. Избранные фрагменты (в переводе и с примечаниями И. С. Петерского), М., 1984, с. 25.

² Курс международного права, т. 2. М., 1989, с. 169.

³ Նույն աեղում:

նեցում՝ անկախությամբ⁴։ Ինքնիշխանությունը յուրաքանչյուր պետության հատկանիշն է՝ իր ծագման պահից։ Շնորհիվ ինքնիշխանության պետությունը համարվում է միջազգային իրավունքի սուբյեկտ։ Պետության միջազգային իրավասուբյեկտ լինելը կախված չէ միջազգային իրավահարաբերությունների մյուս սուբյեկտների կամքի արտահայտությունից, և պետության գոյության փաստն ինքնին պայմանավորում է նրա միջազգային իրավասուբյեկտությունը։ Պետական ինքնիշխանությունը և նրա միջազգային իրավասուբյեկտությունը վերանում են միայն պետության գոյության դադարեցման հետևանքով⁵։ Ինչպես տեսնում ենք, ինքնիշխանությունը բնաիրավական և իրավաքաղաքական հատկանիշ է և գոյություն ունի այնքան ժամանակ, որքան այն կրող սուբյեկտները (անձը, ազգը և պետությունը)։

Անձի և ազգի ինքնիշխանության իրական և գործնական արտահայտությունը հնարավոր է միայն իրավական-քաղաքական հասարակարգերում, որտեղ գերիշխում են իրավունքը և օրենքը։ Բռնատիրական-ամբողջատիրական պետություններում (կայսրություններում, ֆաշիստական, կոմունիստական և այլ ոչ իրավական պետություններում) ոչ միայն սահմանափակվում, այլև ոտնահարվում է անձի և ազգի ինքնիշխանությունը։ Իրավական պետության կարևորագույն հատկանիշներից մեկն է անձի և ազգի ինքնիշխանության իրական, փաստացի դրսևորումը։

Անձի, ազգի և պետության ինքնիշխանության հիմնախնդիրը իր որոշակի արտացոլումն է գտել միջնադարյան Հայաստանի մատենագրական և իրավական հուշարձաններում։ Հայ մատենագիրների աշխատություններում և իրավական հուշարձաններում ինքնիշխանության հիմնախնդիրը, ամբողջությամբ համապատասխանում էր հայ ժողովրդի ազգային-ազատագրական պայքարի պահանջներին։ Այսպես, V դ. հայ մեծանուն մտածող Մեսրոպ Մաշտոցը, խոսելով աստծու՝ մարդկանց մի շարք բարեմասնություններով օժտելու մասին, միաժամանակ նշում է. «Եւ անձնիշխան կամոք մեծաբնաց զմարդիկ»⁶։ Ուրեմն, ըստ Մաշտոցի, մարդու հիմնական հատկանիշներից են կամքի ազատությունը, անձնիշխանությունը։ Անձնիշխան կամքը մարդկանց տրված է, որպեսզի նրանք «կարասցեն խոյս տալ ի շարէն և առնել զբարէն» (131)։ Կամքի ազատության շնորհիվ մարդը պետք է ընտրություն կատարի բարու և չարի միջև։ «Զի զամենայն շարժումս արուեստիցն, ող ի մարդիկ ի կամացն շարժին ի լաւն կամ ի վատթարսն, զի իշխանականն ունի զերկաքանչիւրոցն զկամս բարւոյն և չարին» (54)։ Բարի գործեր կատարելիս, մարդը ոչ միայն կատարում է իր երկրային և երկնային պարտքը, այլև արժեքավորում իրեն։ «որք յարգեն զանձինս իւրեանց ի գործս բարութեան» (187)։ Խոսելով թագավորական իշխանության մասին, Մաշտոցը նշում է, որ աշխարհիկ իշխանությունները (թագավորական, իշխանական, դասական) աստծո կամքով առաջացել են երկրում խաղաղություն և կարգուկանոն պահպանելու, օրինազանցներին պատժելու համար։ «Այլ և զթագաւոր և զիշխանս և զդատաւորս ի խաղաղութիւն և ի իշխանութիւն աշխարհաց կարգեաց աստուած. զի զամբարիշտս, զշունս, զգողս, զկախարդս և զամենայն անիրաւս պէսպէս տանջանօք և մահուամբ զարհուրեցուցեն, զի ամենայն շարագործք ըմբռնեալ ի յահէ արդելցին ի չարեաց» (106)։ Ուրեմն, Մաշտոցը պետական իշխանությունների հիմնական գործառությունը տեսնում է իրավակարգի և օրինականության պահպանման մեջ։ Այն խիստ արդիական է նաև մեր օրերի համար։

Մաշտոցի աշակերտ Եղնիկ Կողբացին ընդհանրապես դեմ էր միջնադարում լայնորեն տարածված ճակատագրապաշտական ուսմունքին և կարծում

⁴ Տե՛ս В. Шевцов, Государственный суверенитет, М., 1979, с. 5; Курс международного права, т. I, с. 166.

⁵ Տե՛ս Курс международного права, т. 2, с. 167.

⁶ Մարտի հօրն մերոյ Գրիգորի Լուսաւորչի Յաճատապատում ճառք, Վենետիկ, 1954, էջ 34 (այսուհետև էջերը կնշվեն բնագրին կից)։

էր, որ անձը և ազգը օժտված են ինքնիշխանությամբ: Յուրաքանչյուր անհատ և ժողովուրդ յուրովի է իրականացնում կամքի ազատությունը՝ կախված որոշակի իրադարձություններից և պայմաններից: Անձի ինքնիշխանությունը, ըստ Կողբացու, ամենևին էլ չի նշանակում ամենաթողություն, անպատասխանատվություն, հասարակության մեջ անիշխանություն: Ընդհակառակը, պատիժը, պատասխանատվությունը ինքնաբերաբար ենթադրում են կամքի արտահայտություն, քանզի օրինազանցությունները տեղի են ունենում ոչ թե ճակատագրի բերումով, այլ անձի կամքի թելադրանքով: Ճեղքված ղեկավարը պիտի կատարվեն ճակատագրի ինչ-որ սահմանումով, ապա ոչ թագավորները պիտի մահվան հրաման տան, ոչ էլ դատավորները պիտի տանջեն ու սպանեն մարդասպանին: Այնինչ, նրանք պատիժ տալով հայտնի են դարձնում, որ հանցավորների հանցանքները ոչ թե ճակատագրի ինչ-որ սահմանումով, այլ շարագործ բռնությամբ են լինում: Ըստ Կողբացու, ինքնիշխանությամբ օժտված են ոչ միայն անհատները, այլև ազգը, ժողովուրդը: Եվ պատահական չէ, որ ազգային-ազատագրական պայքարի գաղափարախոսության հիմնաքարերից մեկը անձի և ազգի ինքնիշխանության ուսմունքն է, որը, հայ ժողովրդի մեջ ձևավորվելով V դարում, իր կենսունակությունը չկորցրեց նրա հետագա ողջ պատմության ընթացքում և հասավ մինչև մեր օրերը:

Ազգերն իրենք պետք է տնօրինեն իրենց ճակատագիրը, կերտեն իրենց ներկան ու ապագան, այլ ոչ թե ապավինեն ճակատագրի կույր ուժին կամ էլ ինչ-որ երկրորդ, երրորդ և այլ ուժերի ողորմածությանը: Այս կապակցությամբ Եղնիկ Կողբացին հետևյալ ցայտուն օրինակն է բերում. «...Նրբավազակախումբը արշավում է երկիրը՝ մարդկանց կողոպտելու և կոտորելու համար, թող զորք չհավաքեն ու իրար ետևից գնդեր չկազմեն՝ երկրից ավազակներին դուրս քշելու համար, այլ թող պատճառաբանեն, թե՛ «երկրի ճակատագիրն է ավազակից կոտորվել, մենք ինչո՞ւ պիտի դեմ գնանք ճակատագրին»: Բայց զորքեր գումարելով և երկրից թշնամուն դուրս վռնդելով՝ ցույց են տալիս, որ կոտորածները ճակատագրի ինչ-որ սահմանումով չեն տեղի ունենում, այլ՝ ավազակի բռնությամբ, որ գալով անհագաբար կոտորում է ժողովրդին, զրկում ունեցվածքից»:

Ահալի Պարթևի և Մեսրոպ Մաշտոցի մյուս աշակերտը՝ Մովսես Խորենացին, ավելի խոր և բազմակողմանի ուսումնասիրելով իր ժողովրդի պատմությունը, եկավ այն եզրակացության, որ ժողովրդին առանց քաղաքական կազմակերպության դատապարտված է զրկանքների, տառապանքների և կործանման: Քանզի թագավորության (պետության) հաստատումով հասարակության մեջ տիրում է կարգ ու կանոն, իշխանության կողմից ընդունվում են հասարակական հարաբերությունները կարգավորող իրավական նորմեր: Հիրավի, խոսելով հայոց պետականության և թագավորների մասին, Խորենացին նշում է. «Քանզի ինձ այսոքիկ արք ի մերոց թագաւորաց են սիրելիք, որպես բնիկք և իմոյ արեան առուք և հաւաստի հարազատք: Եւ սիրելի էր ինձ՝ յայնժամ գալ Փրկչին և զիս գնել, և առ նոքօք յաշխարհ զմատն իմ առնիլ, և նոցա տէրութեամբն խրախճանայս»:

Պատմությունը Խորենացու համար ինքնանպատակ չէ, այն ազատության, անկախության և պետականության հաստատման համար պայքարող ժողովրդի ժամանակագրությունն է, որը պետք է ծառայի ներկա և գալիք սերունդների շահերին: Թագավորությունը պատմականորեն առաջացած հաստատություն է, որի հիմնական առաքելությունը ոչ միայն կարգ ու կա-

7 Եղնիկ Կողբացի, Եղծ աղանդոց, Թարգմանությունը, Ֆերածությունը և ծանոթագրությունները՝ Ա. Ա. Աբրահամյանի, Երևան, 1970, էջ 109:

8 Նույն տեղում:

9 Մովսես Խորենացի, Պատմութիւն Հայոց, Երևան, 1991, էջ 66—67 (այսուհետև բնագրում՝ Խոր. և էջը):

նոնի հաստատումն է, այլ նաև երկրի միավորումը: Ինչպես նշում է ակադ. Գ. Սարգսյանը, «Մովսես Խորենացու ողբերգության ակունքը նրա քաղաքական համակրանքների և իդեոլոգիայի երկատվածությունն է: Ժամանակի հայ հասարակության երկու ղեկավար ուժերը՝ նախարարությունը՝ Պատմահոր աշքում ժողովրդի առաջընթացի մղիչ ուժը, և թագավորական իշխանությունը օտարների հարձակման սպառնալիքի պայմաններում երկիրը համախմբողն ու միավորողը, իրենց վեհ առաքելությունը թողած, հակամարտության մեջ էին գտնվում... այդ եղբայրասպան բախումները դյուրացնում էին Հայաստանը շրջապատող երկու հզոր ռազմաքաղաքական ուժերի՝ Իրանի և Հռոմի (Բյուզանդիայի) քայքայիչ գործունեությունը և վերջիվերջո հանգեցրին հայրենի երկրի բաժանմանն ու քաղաքական անկախության կորստին»¹⁰:

Ազգի միասնությունը ամենակարևոր նախապայմանն է ազատ, անկախ և ուժեղ պետականության համար, վերջինս էլ իր հերթին ժողովրդի բարօրության և երջանկության գրավականն է: Այս տեսակետից Խորենացին մեծաբան է անցյալի հայոց այն թագավորներին, որոնք միավորեցին և ընդարձակեցին երկիրը, բարձրացրին հայոց պետականության հեղինակությունը: Այսպես, խոսելով Ծովանդյան Տիգրանի մասին՝ դրում է. «Քանզի սա ամենեցունց թագաւորացն մերոց հարստագոյն և խոհեմագոյն, և արանցն այնոցիկ և ամենեցուն քաջ: Որ և Կիրոսի աջակցեալ, գլխաւոյն ի բաց բառնալով զիշխանութիւնն, և զՅոյնս ոչ սակաւ ժամանակս ընդ իւրեաւ նուաճեալ հնազանդէր: Եւ զսահմանս մերոյ բնակութեանս ընդարձակեալ ի հինսըն մեր հասուցանէր յեզերս ծայրից բնակութեան, և ամենեցունց որ առ իւրովքն էին ժամանակոք՝ նախանձելի, և զկենացս ըղձալի ինքն և ժամանակ իւր» (Խոր., 71):

Ուրեմն, պետական ինքնիշխանությունը Խորենացու կարծիքով ոչ միայն ազատ և անկախ կարգավիճակ է, այլ նաև ուրիշներին իշխող և հպատակեցնող կեցություն: Այդպես էր ժամանակաշրջանի հրամայականն ու պահանջը, հետևաբար և դարաշրջանի մտածողությունը, քանզի յուրաքանչյուր մտածող, ինչպես նշում է գերմանացի հանճարեղ փիլիսոփա Հեգելը, «իր ժամանակի որդին է... ու հեթեթություն է կարծել, թե որևէ փիլիսոփայություն կարող է դուրս գալ իր ժամանակի աշխարհի սահմաններից, նույնպիսի անհեթեթություն է ենթադրել, որ անհատը ի վիճակի է թռչել իր ժամանակի վրայով»¹¹:

Անձի, ազգի և պետական ինքնիշխանության հարցերի քննարկումը հայ իրականության մեջ նոր թափ ստացավ զարգացած ավատատիրության ժամանակաշրջանում, մասնավորպես XI—XII դդ.՝ պատմական Հայաստանում՝ հանձին Մխիթար Գոշի, իսկ Կիրիկյան հայկական պետությունում՝ Ներսես Շնորհալու և Ներսես Լամբրոնացու:

Մխիթար Գոշը բնական իրավունքի տեսությամբ եկավ հիմնավորելու հայ ժողովրդի ազատագրական պայքարը և դրա գաղափարական հիմքը հանդիսացող մարդ-անհատի և ազգի կամքի ազատությունը, որը, ինչպես վերը նշեցինք, առաջ էին քաշել V դ. հայ մեծանուն մտածողները և, մյուս կողմից՝ իրավական հիմք (կազմելով Դատաստանագիրքը) ստեղծել վերականգնվելիք հայոց պետականության համար: Հասկանալի է, որ մարդ-անհատի կամքի հետևողական ընդունումն արմատապես ժխտում է աստվածային որևէ նախասահմանում: Նշված հասկացությունները անհարիր են միմյանց, և այն փիլիսոփաները, աստվածաբանները, իրավաբանները, որոնք փորձել են կամքի ազատությունը զուգակցել նախասահմանման հետ, անխուսափելիորեն ընկել են հակասության մեջ: Այսպես, Մխիթար Գոշի

¹⁰ Мовсес Хоренацци, История Армении. Перевод с древнеармянского языка, введение и примечания Г. Саркисяна, Ереван, 1990, с. XLVI.

¹¹ Георг Вильгельм Фридрих Гегель, Философия права, М., 1990 с. 55.

ժամանակակից Թոմա Աքվինացին, ընդունելով կամքի ազատությունը, միևնույն ժամանակ նշում էր. «Կամքի ազատությունը գոյություն ունի միայն այն դեպքում, երբ նրան հովանավորում է ստովածը, քանզի նա է համարվում առաջին աղբյուրը ինչպես բնական պատճառների, այնպես էլ ազատ մարդկային որոշումների»¹²։ Միսիթար Գոշը նույնպես ընդունում է մարդու կամքի ազատությունը, սակայն մարդու կամքի ազատության ակունքը գտնում է ոչ թե աստվածային նախասահմանման, այլ «բնավորական» իրավունքի մեջ, որովհետև «Զի օրէնքն եւ Աւետարանն զբնաւորական օրէնսն յիշեցուցանեն, բայց զանձնիշխանականսն ոչ բառնան»¹³։ Ծիշտ է, մարդիկ իրենց ծնունդով պարտական են աստծուն՝ «Ազատ յԱրարչէն եղեւ մարդկայինս բնութիւն», սակայն իրենց գործողություններում ազատ են. «Ի մեր կամս էառ ամենայն մարդ իրաւամբք վարիլ» (Դատ., 7)։ Ուրեմն, անձի կամքի ազատության ակունքը «բնաւորական» է, կրում է ինքնավար-մարդկային բնույթ։

Ինչպես նշեցինք, Մովսես Խորենացու նման, Գոշը նույնպես մտահոգված էր երկրի բոլոր ուժերի համախմբման ու միասնության հարցերով։ Այդ կապակցությամբ Գոշը, ներկայացնելով հյուսիս-արևելյան Հայաստանի XII դ. 60—70-ական թվականները, միաժամանակ պարսավում է հայ իշխաններին, որոնցից յուրաքանչյուրը, մեկուսացած, առանձնացած, մի կերպ իր գոյությունն էր պահպանում, փոխանակ համախմբվելու և միավորվելու ընդհանուր թշնամու դեմ՝ հայրենիքի ազատության և թագավորության վերականգնման համար. «Ի ժամանակս բռնակալութեանն Ղեմացուց» յորում վաղ ուրեմն Բալձեալ էր թագաւորութիւնն Հայոց ի սպառ-սպառ, և անտե-րունչի շրջէին մնացորդք իշխանաց՝ որ ընդ բնաւ աշխարհս փարատեալք՝ ոչ հնազանդելով միմեանց...», և իշխանները չլաւ համարէին ի ստրկութեան. կալ ամենայն ազգաց, քան թէ հնազանդել միմեանց և՛ կեալ յազատութեան»¹⁴։ Գոշը երկրի միասնությունը և անկախությունը տեսնում էր ուժեղ, ինքնիշխան պետականության մեջ և վերջինս կապում է թագավորի անձի հետ. «Թագաւորք այնոքիկ անուանին, որք ազգաց խաբանց տիրեն միանգամայն եւ յձյ-լոց հարկ տունուն յազգաց, եւ եթէ ոչ՝ ոչ հարկիցին» (Դատ., 299—300)։

Ինչ խոսք, Գոշի՝ պետական ինքնիշխանության սահմանման, ինչպես նաև նրա ողջ աշխարհայեցողության վրա իր կնիքն է դրել ավատատիրական ժամանակաշրջանի մտածելակերպը, որն արտահայտվում է հետևյալում. «Առաջին, Գոշը պետական ինքնիշխանության կրողն է համարում թագավորին, քանզի թագավորն է պետության գլուխը, երկրորդ, ուրիշ ժողովուրդներից (պետություններից) հարկ վերցնելը նույնպես միջնադարյան միջպետական հարաբերությունների շափանիշներով դիտվում էր որպես բնականոն երևույթ։ Չնայած այս միջնադարյան քողին, այնուամենայնիվ, պետական ինքնիշխանության մասին Գոշի հասկացողությունը հեռու չէ պետական ինքնիշխանության ժամանակակից գիտական սահմանումից։ Գոշը ինքնիշխանության կարևոր հատկանիշներ է համարում պետության զերիշխանությունը հպատակ ժողովրդի նկատմամբ և անկախությունը՝ արտաքին հարաբերություններում։ Սակայն պետական ինքնիշխանությունը անսահմանափակ չէ ինչպես երկրի ներսում, այնպես էլ արտաքին հարաբերություններում։ Թագավորին օժտելով պետական ինքնիշխանությամբ, այնուհանդերձ Գոշը որոշակի իրավանորմերով սահմանափակում է նրա իշխանու-

12 Ю. Боргош, Фома Аквинский, М. 1966, с. 139.

13 Միսիթարայ Գոշի Դատաստանագիրք Հայոց, իրավաբանական հետազոտությունք հանդերձ ծանօթութեամբք վ. Բաադամեանցի, Վաղարշապատ, 1880, նախադրութիւն, էջ 7 (այսուհետև բնագրում՝ Դատ. և էջը)։

14 Հայոց նոր վկաները, աշխատասիրությամբ Հ. Մանանդյանի և Հ. Աճառյանի, Վաղարշապատ, 1903, էջ 23։

թյունը. «Դատաստանաւ վարենցի յամենայն իրս եւ ի գործս հաւատացեալ թագաւոր» (Դատ., 306), Օրենքին ենթարկվելը պարտադիր է բոլորի, այդ թվում և թագավորի համար, որովհետեւ քանի դեռ գործում է օրենքը, ապա այն պետք է պահպանվի. «զի օրէնք է և պահէլի» (Դատ., 228):

Հայտնի է, որ միջնադարում ժողովուրդների հակամարտության և պատերազմների աղբյուր էին նաև դավանաբանական վեճերը և կրոնական անհանդուրժողականությունը: Գոշի ապրած ժամանակաշրջանում հունա-լատինադավան եկեղեցիների առաջ քաշած ընդհանրական եկեղեցու գաղափարը միահյուսվում էր բյուզանդական կայսրության ամբողջատիրական քաղաքականությանը և մեծ վտանգ էր հարկան ժողովուրդների, այդ թվում՝ հայ ժողովրդի և նրա ազգային եկեղեցու ինքնուրույնության համար¹⁵: Մի խոսքով, եկեղեցիների միության գաղափարը և քաղաքականությունը ծուղակ էր, որով քողարկվում էր հայ ժողովրդին քաղաքականապես կյանելու գործնական ուղղվածությունը:

Բացի դրանից, Մխիթար Գոշը քաջ գիտակցում էր և այն, որ Հայաստանի ապապետականության պայմաններում աղղային եկեղեցին միակ կազմակերպությունն էր, որ միմյանց էր միավորում Հայաստանի բոլոր մասերը և հասարակական խավերը՝ դառնալով համահայկական միակ միավորիչ և համախմբող ուժը: Ուստի Մխիթար Գոշը ողջ գործունեությամբ և Դատաստանագրքի իրավական նորմերով պաշտպանում էր ազգային եկեղեցու դիրքն ու հեղինակությունը: Մխիթար Գոշը նշում է, որ բոլոր ազգերն էլ ինչպես բարի, լավ, այնպես էլ վատ կարգեր ունեն. «զի չիք ազգ, որ բարի կարդ ոչ ունի և խոտան»¹⁶, և դրանից ելնելով, չի կարելի թշնամություն սերմանել իրար նկատմամբ: Առավել ևս սխալ է և անթույլատրելի բռնի, հարկադրական, արհեստական միաբանության ճանապարհը: Միակ ուղին, որով ժողովուրդները պետք է ընթանան, փոխադարձ հանդուրժողականությունն է, միմյանց լավ կամ վատ կարգերը հարգելը, ներքին գործերին չմիջամտելը. «Արդ, այլ ինչ հնար բառնալոյ զայդ հակառակութիւնդ ոչ տեսանեմք, բայց թէ միմեանց հաւանելն և կալ յիւրաքանչիւր կարգի ամենայն ազգ»¹⁷:

Ուրեմն՝ պետությունները բացարձակ ինքնիշխան չեն նաև արտաքին հարաբերություններում, նրանց ինքնիշխանությունը սահմանափակվում է այն դեպքում, երբ շոշափվում են ուրիշ պետությունների և ժողովուրդների օրինական իրավունքներն ու շահերը: Դեռ սովելին. Մխիթար Գոշը սահմանում է, որ եթե ինքնիշխան թագավորը անարժանաբար վարի թագավորությունը և անհարկի խախտի խաղաղությունը, ապա այդպիսի թագավորը զահրկեց պետք է տրվի. «Եթէ իշխանք թագաւորեցուցեն և ոչ ըստ արժանւոյն վարէ զթագաւորութիւնն, ի նոցանց կարգողացն աքսորեսցի...: Իսկ զթագաւոր խրատել, եթէ այնպէս հարկ լիցի պահել զխաղաղութիւն» (Դատ., 422):

Պետական ինքնիշխանության մասին Գոշի սահմանումից միայն չորս դար հետո ֆրանսիացի նշանավոր մտածող Ժան Բոդենը (1530—1596) նվիրողալով անաջինը ձևակերպեց պետական ինքնիշխանության մասին ուս-

¹⁵ Այդ մասին տե՛ս Կալանօս, Միպրանութիւն հայոց եկեղեցւոյն ընդ մեծի եկեղեցւոյն Հռոմսլ, հ. Ա, Հոռմ, 1690, Մ. Օրմանյան, Հայոց եկեղեցին, Կոստանդնուպոլիս, 1911, նույնի՝ Աղղապատում, Կ. Պոլիս, 1912, Ա. Պալէյան, Պատմութիւն կաթողիկէ վարդապետութեան, Վիեննա, 1878, Հ. Բարթիկյան, Նոր նյութեր Կիլիկիայի հայկական պետության և Բյուզանդիայի փոխհարաբերությունների մասին (Բանբեր Մատենադարանի, 1958, № 4), Գ. Հ. Գրիգորյան, Հասարակական-փոխադարձական միտքը Հայկական Կիլիկիայում, Երևան, 1979 և այլն:

¹⁶ Քաղաք Մխիթար Վարդապետին, որ Գօշն կոչուր (Արարատ, 1890, էջ 503—504):

¹⁷ Նույն տեղում, 1901, էջ 125:

մունքը, իր «Վեց գիրք պետության մասին» (1576) գրքում: Այնուհանդերձ, իրավագիտությունը որպես պետական ինքնիշխանության ուսմունքի հիմնադիր է ճանաչում ժան Բոգենին¹⁸:

XII դ. Կիրիկյան հայկական պետության նշանավոր եկեղեցական-հասարակական գործիչ Ներսես Շնորհալին (1102—1173) որոշակիորեն ընդգծել է անձ-անհատի անձ-իշխանությունը, որպես նրա անկապտելի հատկանիշ. «Աստուած իշխան է ամենայն եղելոց, և զոր ինչ կամի առնէ անձնիշխանաբար յարարածս իւր, և ոչ ոք ընդդիմանայ եղելոցն ի նմանէ. նոյնպէս և մարդս իշխան է ըստ հոգւոյ անձին իւրոյ կամաց, զի զոր ինչ կամի առնէ, եթէ բարի և եթէ չար»¹⁹: Ակնհայտ է, որ անձի ինքնիշխանությունը Շնորհալին բացարձակացնում և նույնիսկ զուգահեռներ է անցկացնում աստծու և մարդու անձնիշխանության միջև և մարդու կամքը դիտում որպես նրա բանական գործունեության դրսևորում, անկախ որևէ նախախնամությունից:

Կիրիկյան հայկական պետության մեկ այլ նշանավոր գործիչ՝ Ներսես Լամբրոնացին (1153—1193) նույնպես գտնում է, որ յուրաքանչյուր բանական էակ օժտված է անձնիշխանությամբ: Վկայակոչելով հենց աստվածային պատգամները, նա գրում է. «Յօրէնս տեսնեալս ասէ՝ լիցին կամք նորա, այսինքն՝ անձնիշխան կամքս, զոր ոչ աստուած կարէ առանց մեր ախորժելոյ հաւանեցուցանել»²⁰: Լամբրոնացին նշում է, որ անձի ինքնիշխան հատկանիշը նրա բնական իրավունքն է, անբաժան մասը: Յուրաքանչյուր մարդ կամ ժողովուրդ, եթե չի ցանկանում ծառա և ստրուկ լինել ուրիշին, ապա անհնար է նրան ստրկացնել: Մառա կամ ստրուկ լինում են իրենց կամքով, կամավոր հնազանդությամբ. «Մեր կամաց է իշխանութիւն պատրաստել զանձինս ծառայս՝ որում հնազանդիմք»²¹: Մեկ այլ աղիթով Լամբրոնացին գրում է. «Զի ամենայն իՅ լ մեր ի շարն որոշի և ի բարին ոչ ըստ բնութեան, այլ ըստ անձնիշխան կամաց, քանզի որ բարի է՝ կարող է չար փոփոխել և որ չար՝ կարող է բարի»²²:

Սակայն և Դոշը, և Շնորհալին, և Լամբրոնացին քաջ գիտակցում են, որ հասարակական կյանքում բացարձակ ինքնիշխանությունն անհնարին է և անիմաստ: Մարդու ինքնիշխանությունը, ըստ նրանց, ոչ այնքան աստվածային նախախնամությամբ է սահմանափակված, որքան իրավական, բարոյական, սովորութային նորմերով: Ըստ Դոշի, «Աստուած ի սկզբանէ ի բնութիւն մարդոյն սահմանեաց ընտրել զիրաւացին» (Դատ., 6): Ներսես Լամբրոնացին և Ներսես Շնորհալին յուրաքանչյուրին որպես ուղեցույց և վարքագծի կանոն առաջարկում են հետևյալ կարգախոսները. «Զոր քեզ ոչ կամիս, մի և այլոցն արասցես»²³, «Զոր ինչ քեզ չար թուի, ընկերին մի առնէր, և զոր ինչ կամիս թէ առնեն քեզ ալք, զնոյն արա և դու այլոց»²⁴:

Այսպիսով, միջնադարյան հայ մտածողները, դեռևս V դ. սկսած, որոշակիորեն ընդունել և ընդգծել են անձի, ազգի և պետության ինքնիշխանությունը, սակայն միևնույն ժամանակ, քաջ գիտակցել, որ ինքնիշխանությունը բացարձակ և անսահմանափակ հասկացություն չէ, այն որոշակիորեն սահմանափակված է աստվածային նախախնամությամբ և, հատկապես, իրավական, բարոյական, սովորութային նորմերով:

18 Г. Б. Агабеков, Жан Боден—основоположник концепции государственного суверенитета (Научно-аналитический обзор АН СССР, М., 1990).

19 Ն Ե ր ս Ե ս Շ Ն ո Ր Հ ա լ ի, Ը ն դ հ ա ն ր ա կ ա ն Թ ու ղ Թ ք, Ն ր ու ս ա ղ Ե մ, 1871, էջ 287:

20 Ն Ե ր ս Ե ս Լ ա մ Բ Ր Ո Ն ա Յ ի, Մ Ե կ ն ու Թ ի ն, Մ ա ղ մ ո ս ա Յ Դ ա թ ի (Մ ա շ տ ո Յ ի անվան Մ ա տ Ն Ն ա ղ ա ր ա ն, ձեռ. № 4694, էջ 10ր):

21 Ն ու յ ն տ ե ղ ու մ:

22 Ն ու յ ն տ ե ղ ու մ, ձեռ. № 1142, էջ 197ա:

23 Ն ու յ ն տ ե ղ ու մ, ձեռ. № 4694, էջ 84բ:

24 Ն Ե ր ս Ե ս Շ Ն ո Ր Հ ա լ ի, Ը ն դ հ ա ն ր ա կ ա ն Թ ու ղ Թ ք, էջ 222:

ПРОБЛЕМА СУВЕРЕНИТЕТА ЛИЧНОСТИ, НАЦИИ И
ГОСУДАРСТВА В СРЕДНЕВЕКОВЫХ АРМЯНСКИХ
ЛЕТОПИСНО-ПРАВОВЫХ ПАМЯТНИКАХ

Г. Г. САФАРЯН

Р е з ю м е

Постановка и решение проблемы суверенитета личности, нации и государства в армянской летописно-правовой мысли была весьма оригинальной и прогрессивной не только для своего времени, но и для последующих эпох. По мнению выдающихся армянских мыслителей (Месропа Маштоца, Езника Кохбаци, Мовсеса Хоренаци, Мхитара Гоша, Нерсеса Шнорали, Нерсеса Ламбронаци), воля человека самовластна, человек как разумное существо сам выбирает свои действия, являясь, таким образом, творцом своего поведения. Необходимость правовых, моральных, обычных норм они считали доказательством свободы воли человека. Более того, Мхитар Гош, впервые в истории политико-правовой мысли, дал определение государственного суверенитета. Учение Мхитара Гоша о государственном суверенитете явилось выражением борьбы общенациональной государственной власти в Армении за свою независимость. Именно в этом смысле данная теория давала идеологическое обоснование стремлению королевской власти создать единое централизованное государство.